

四庫全書

史部

欽定四庫全書

史部

景定建康志卷三十八至四十一

詳校官監察御史_臣沈孫璉

檢討_臣德生覆勘

總校官檢討_臣何思鈞

校對官中書_臣張曾炳

謄錄監生_臣陳燦

欽定四庫全書

景定建康志卷三十八

宋 周應合 撰

武衛志一

武事非聖人所先也而衛國衛民有不可廢禹貢之制
奮武衛於綏要之間所以固內而備外者雖盛時未嘗
忘也豈若後世敵至而懼敵去而玩者哉周文武時命
將帥遣戍役亦惟曰守衛中國而已又豈若後世黷武
逞威而至於弗戢自焚者哉自吳以來立國江南者莫

不恃江以為固江又恃人以為固人謀善而武事修則江為我之江否則與敵共爾易曰天險不可升也地險山川丘陵也王公設險以守其國險必能設國乃可守今之建康內屏畿甸外控淮堦寔長江之要會中興以來任重臣建大閫用名將宿重兵於此上接荆鄂下聯海道守衛至重安危所關審形勢而後知攻守之宜審攻守而後知江防之要嚴江防而後知兵籍之不可單兵政之不可怠兵船之不可不備兵器之不可不利兵

寨之不可不整烽燧之不可不謹而浚築之不可不勤也作武衛志

形勢

諸葛亮曰鍾阜龍蟠石城虎踞真帝王之宅 丹陽記曰石頭因山為城因江為池地形險固尤有奇勢 李綱曰天下形勢關中為上建康次之宜以長安為西都建康為東都 衛膚敏曰建康寔是帝都外連江淮內控湖海為東南要會之地 劉琨曰金陵天險前據大

江可以固守 張浚曰東南形勢莫重於建康寔為中
興根本 陳亮曰舊日臺城在鍾阜之側據高臨下東
環平岡以為安西城石頭以為重帶元武湖以為險擁
秦淮青溪以為阻是以王氣可乘而運動如意 江默
曰自淮而東以楚泗廣陵為之表則京口秣陵得以蔽
遮自淮而西以壽廬歷陽為之表則建康姑孰得以襟
帶表裏之形合則東南之守不孤其來尚矣餘見江防

攻守

張敦頤曰晉蔡謨曰時有否泰道有屈伸暴逆之寇雖終滅亡方其強盛皆當詘而避之要終歸於大濟而已為今之計莫若養威以俟時王羲之曰以區區江左營綜如此天下寒心久矣中興之業政以道勝寬和為本力爭武功非所當作二人者能言之而不得行之行之而足以安江南者孫權一人耳陸瑁嘗勸權曰九域盤互之時率須深根固本愛力惜費陸遜嘗勸權曰施德緩刑寬賦息調權報之曰發調者蓋謂天下未定事以

衆濟若徒守江東修崇寬政兵自足用何以多為顧坐
自守可陋耳以此知權之志未嘗不在於天下然以傳
考之亦未嘗肯求逞於中原曹公來侵則破之拒之而
已治艦立塢築堤遏湖作涂塘明烽燧始終所以備魏
者至矣及移牋於曹公曰足下不死孤不得安則權固
未嘗得志也嘉禾中因蜀寇魏一攻淮南聞明帝東行
遽則斂避諸將之攻樊城司馬懿救之亦引軍亟退自
後世觀之謂之怯可也而權不以為恥豈非天下之勢

既未有可投之隙與其力爭而取敗不若退守而待時也耶史稱權繼父兄之業有臣以為腹心股肱爪牙兵不妄動故戰少敗而江南安此權之所以為治也及嗣主立諸葛恪為政首侵邊以怒敵東興之戰韋捷顧不能持勝復違衆大舉一敗塗地恪既喪軀而孫氏之業因以衰焉則權之兵不妄動利害果何如也其後孫皓用諸將計數侵盜晉鄙陸抗曰苟無其時雖復大聖亦宜養威自保不可輕動今不務力農富國審官任能明

黜陟慎刑罰訓諸司以德拊百姓以仁而聽諸將徇名窮兵黷武動費萬計士卒凋弊寇不為衰而我已大病矣夫爭帝王之資而昧十百之利此人臣之姦便非國家之良策也抗之言兼有陸瑁陸遜蔡謨王羲之之論而皓不知用此其所以亡也東晉自庾亮經營征伐皆不能有成謝安父子乘苻堅傾敗之餘圖之如恐不及也至於渡河入鄴訖無尺寸之得宋文自以富強詰戎兵於元魏檀道濟再行無功皆諸將以敗繼敗而胡馬

遂至瓜步梁武遭魏世之亂陳慶之以數千兵入洛而
嵩高之襲幾至殲盡及貪河南之地納叛將棄睦鄰而
負國顛覆陳宣帝闢土宇於北齊旋失淮泗於後周雖
以桓溫劉裕非常之才度越歷代諸將而溫伐苻健慕
容暉皆幾成而敗裕平南燕滅姚秦亦既得而失則六
朝用兵攻伐之策可見矣

詳見表

江防

吳聿曰江出岷山自湖口合流而下奔放蕩潏吐吞日

月山或磯之則其勢悍怒觸舞大舩兀若轉梗至其廣處曠數百里斷岸相望僅指一髮而舳艫上下中流遇風則四顧茫然無所隱避自金陵抵白沙其尤者為樂官山李家漾至急流濁港口凡十有八處稱號老風波而玩險阻者至是鮮不袖手 吳志曰魏文帝有渡江之志望江水盛長彌漫數百里便引退自歎曰魏雖有武騎千羣無所用也 干寶晉紀曰魏文帝之在廣陵吳人大駭乃臨江為疑城自石頭至於江乘垣以木楨

衣以葦蓆加采飾焉一夕而成魏人自江北望甚憚之
曰彼有人焉未可圖也乃還 宋書元嘉二十七年魏
聲欲渡江太祖大具水軍為防禦之備領軍將軍劉遵
考左將軍尹宏守橫江少府劉興祖守白下建威將軍
黃門侍郎蕭元邕守裨洲羽林左監孟宗嗣守新洲上
建武將軍泰容守新洲下征北中兵叅軍向柳守貴洲
司馬到元度守蒜山諮議叅軍沈曇慶守北固尚書褚
湛之先行京陵使仍守西津徐州從事史蕭尚之守練

壁征北叅軍管法祖守譙山徐州從事武仲河守博落
尚書左丞劉伯龍守采石尋遷建武將軍淮南太守仍
總守事遊邏上接于湖下至蔡洲陳艦列營周亘江畔
自采石至暨陽六七百里船艦蓋江旗甲星燭皇太子
出戍石頭徐湛之守石頭倉城 齊書建元元年魏主
宏聞太祖受禪其冬發衆遣丹陽王劉昶為太師寇司
豫二州明年詔遣衆軍北討初虜寇至緣淮驅略江北
居民猶懲佛狸時事皆驚走不可禁止乃於梁山置二

軍南置三軍慈姥置一軍烈洲置二軍三山置二軍白沙置一軍蔡洲置五軍長蘆置三軍徐浦置一軍以備之魏不能攻 周世宗問江南虛實孫忌答曰本國雖小甲兵尚三十萬世宗曰江南不過十數郡何見欺也忌曰精兵雖止十餘萬然長江一條飛湍千里險過湯池可敵十萬之師國老宋齊丘乃王猛謝安之徒又可敵十萬 張虞卿曰歷考前世南北戰爭之地魏軍嘗至瓜步矣石季龍嘗至歷陽矣石勒寇豫州至江而還

此皆限於江而不得騁者也然江出岷山跨郡十數備之不至一處得渡皆為我憂使吾斥堠既明屯戍惟謹士氣振而人心固矣恃江為阻可也雖無長江之險亦可也苻堅百萬之衆馬未及一飲江水謝玄八千銳卒破之於淮淝豈非其效歟不然任巢以奇兵八百泛舟即渡吳人有北來諸軍乃飛過之語韓擒虎以五百人宵濟采石守者皆醉遂襲取之由是觀之徒恃江而不足於守鮮克有濟矣曹操初得荊州議者謂東南之勢

可以拒操者長江也操既得荊州蒙衝戰艦浮江而下則長江之險已與我共之獨周瑜謂捨鞍馬而仗舟楫非彼所長赤壁之役果有成功至於羊祜之言則以南人所長惟在水戰一入其境長江非復所用他日成功畧如祜言故臣以為有如瑜者為用則祜之言謂之不然可也無如瑜者則祜之言不可不察也彼為說者謂北人以馬為強而江流迅急渡馬為難北人便於作棧而江流迅急非棧能濟是未知侯景以馬數百一夕而

渡王濬自上流來未嘗用棧也州縣一也有最為要害者津渡一也有最宜備豫者苻堅自項城來壽陽侯景自壽陽移歷陽孫恩自廣陵趨石頭王敦渡竹格蘇峻泛橫江侯景渡采石考前世盜賊與夫南北用兵由壽陽歷陽來者十之七由橫江采石渡者三之二至於據上流之勢以窺江左者未論也建炎三年冬金兵自黃州渡又自馬家洲渡時杜充在建康聞敵至以軍六萬列戍江南岸而閉門不出師無統一皆無鬪志王綯

曰杜充提兵守建康不稱任使事乃至此云云明年夏四月韓世忠提舟師截大江以邀金兵相持黃天蕩四十八日烏珠遣使與世忠約日會戰世忠募海船百餘艘進泊金山下仍植一旗書姓名表其上敵望見大笑曰此吾几上肉耳世忠預命工鍛鐵相聯為長綆貫一大鈎徧授諸軍之強壯者平旦敵擁十舟噪而前比合戰世忠分海船為兩道出其背每縋一綆則曳一舟而入敵不得渡復遣使願還所掠及獻馬三千世忠不聽

曰只留下烏珠乃可去時達蘭所遣之兵在儀真江南北兩岸皆敵衆世忠據中流風帆浪楫飄忽若神烏珠閉壘不敢出完顏宗弼謂諸將曰使船如使馬何以破之乃欲自建康謀北歸凡古津渡又被世忠八面控扼不得去或獻謀於蘆場地鑿大渠二十餘里上接江口舟從江背出世忠之上流一夜渠成次早出舟世忠大驚尾擊敗之敵終不得濟一日敵乘天霽無風我所用海舟皆不得動彼乃以輕舠絕江而遁世忠曰窮寇勿

追使去烏珠回江北屯於六合縣達蘭在山東遣人誚
烏珠入寇無功盍止於淮東候秋高相會再寇江南烏
珠以前日渡江之危為辭呂頤浩言敵人多詐難測詔
劉光世分兵以備江岸 紹興三十一年金人萬戶高
景山以兵數萬犯揚州劉錡提大軍禦之於清河敵以
氈裹舟載糧挽而上錡募善沒者鑿舟沈之敵大驚俄
犯揚子橋錡以兵掠瓜洲敵騎逼江錡遣麾下員琦設
伏於皂角林與敵接戰誘敵入張弩俄發敵大敗斬景

山俘數百人逆亮親統細軍駐和州之雞籠山臨江築壇刑馬祭天必欲由采石而渡朝廷詔王權詣行在以池州都統制李顯忠代權命督府叅議官中書舍人虞允文趣顯忠交權兵時顯忠未至允文夜見建康留守張燾議禦敵之計燾但言已當死守留鑰丙子逆亮登壇建黃繡旗二中張黃蓋亮執小紅旗麾衆渡江時王權所留水軍車船咸在而諸將未有統屬莫肯用命盡伏山崦惟提舉張振王琪稍任其責允文自建康因使

人督之敵舟稍近於是振琪與統制時俊盛新等徐出
山崦列右江岸敵初未之覺一見大驚欲退不可我軍
用海鯨船迎擊士皆死鬪敵舟沈溺者數萬其回北岸
者亮皆殺之遂不能濟丁丑敵往來望見車船遽却我
軍復以海鯨船先往北岸截橫林渡口用克敵弓射之
敵兵棄船上岸者悉陷泥中而斃上急差楊存中措置
守江虞允文亦自建康馳至鎮江時江岸有車船二十
四艘敵已瞰江恐臨期不堪駕用存中允文臨江按試

命戰士踏車船徑趨瓜洲將迫岸復回敵兵皆持滿以待其船中流上下回轉如飛敵衆相顧駭愕亮愈忿召諸酋約三日畢濟過期盡殺之諸酋謀曰南軍有備如此進有滄殺之禍退有敵殺之憂奈何有總管萬戴者曰殺郎主與南宋通和則生矣衆曰諾乙未諸酋集兵射殺亮并殺其太傅三妃與謀事者十餘人 紹興中詔沿邊修守備吳表臣言大江之南上自荆鄂下至常潤其要隘處不過七渡下流最隘者二建康之宣化鎮

江之瓜洲是也當擇官兵修器械以謹其防 王彥恢
言建康古都乃用武之地欲保建康必內以大江為之
控扼外以淮甸為之藩籬又必措置兵食以贍國費然
大江以南千里浩渺決欲控扼非戰艦不可大江以北
萬里坦途欲遏長驅非戰車不可舒廬淦和良疇百萬
欲措置軍食非營田不可舟車之法以輕捷為上彥恢
所制飛虎戰艦傍設四輪每輪八楫四人旋幹日行千
里又有神武戰車下安四輪略同飛虎頂張布帷以避

矢石傍斜衝擊其用如神又有拒馬車一人之力可以轉用比之蒙衝偏箱鹿角此尤至要淮西良疇不可以數計不須朝廷給本祇以有無相濟併力營田計其戶口什一養兵則淮西可以守矣如許令彥恢招兵教習只乞那融淮西數州財賦可足舟車之用及以數州秋成所得那融營田可足兵食之費萬一敵人入寇及盜賊猖獗彥恢當以此舟車摧鋒陷陣以此士卒斬將奪旗以此種蒔飛芻輓粟保守江淮決無踈失詔彥恢就

本軍措置 時之論邊防要害者有曰自古倚長江之險者屯兵據要雖在江南而挫敵取勝多在江北故呂蒙築濡須塢而朱威以偏將卻曹仁之全師諸葛恪修東興堤而丁奉以兵三千破胡遵之七萬轉弱為強形勢然也淮甸郡縣不必盡守故城各隨所在擇險據要置寨柵守以偏將敵來仰攻固非其利若長驅深入則我綴其後二三大將浮江上下為之聲援敵之進退落吾計中萬全之策也又有曰無為軍巢縣之濡須及東

西關山川重複蓋昔人尺寸必爭之地大率巢湖之水
上通焦湖濡須正當其衝東西兩關又從而左右輔翼
之餽舟既已難通故雖有十萬之師未能便寇大江得
逞其志淮西雖號地平而水陸要害皆可戰守稍加措
置未易輕犯又有曰若敵重兵出淮西則池州軍出巢
縣江州軍出無為軍便可為淮西官軍之援又有曰自
建康至姑孰一百八十里其險可守者有六曰江寧鎮
曰硤砂夾曰采石曰大信口其下則有蕪湖繁昌皆與

淮南對境其餘皆蘆荻之場或倚岸斗絕水勢湍險難施舟楫又有曰采石渡在太平州界下馬家渡在建康府界上宣化渡在府界之下采石江闊而險馬家渡江狹而平相去六十里皆與和州對岸昔金人入寇直犯馬家渡杜充以萬衆不能捍亦嘗分兵犯采石太平州以鄉兵等禦之遂退雖杜充處置有未盡善亦形勢使然則馬家渡比采石尤為要害又有曰和州烏江縣界可自江北車家渡徑衝建康府馬家渡滁州全椒縣可

自江北宣化渡徑衝建康府之靖安兼泗州盱眙有徑
小路曰張店上下瓦梁盤城亦可徑至宣化不滿三百
里烏珠曾於此路來至六合下寨并自上瓦梁下船直
至滁河口可以入江宜於靖安渡碇砂夾相對三處防
守所有北岸滁河口宣化兩處來路應和州東地分尤

宜嚴切隄防

又有曰昨來金人自黃州張家渡渡江由湖北路鄂州武昌縣上岸方入興國軍大

治縣界取山路以犯江西宜於興國軍大治縣界通山等處擺布防拒又有言曰漢陽沌口係漢江下流湖北

帥司所隸尤宜嚴切隄防

隆興二年議章建康張浚受任督府講

論軍務不遑寢食招來山東淮北忠義之士以實建康鎮江兩軍凡萬二千餘人萬弩營所招淮南壯士及江西羣盜又萬餘人要害之地城壁皆築其可因水為險者皆積水為堰置江淮戰艦諸軍弓矢器械悉備兩年冬金屯重兵十萬於河南為虛聲脅我有刻日決戰之語將士望敵至成大功而敵亦知吾有備卒不敢動及是浚又以宰相來撫諸軍將士踴躍思奮敵聞浚來亦檄宿州之兵歸南京沿邊清野以俟淮北來歸者日不

絕山東豪傑悉願受節度敵益懼 景定元年馬光祖
置鎮巢軍照得本司所部淮西三城獨巢縣正當要害
之衝北據焦湖南扼濡塢跨聯合肥和陽無為三郡自
丙申被兵之後增城築埧屯兵幾至萬人至假邑宰以
節制之權俾任干城之寄去秋上流之警謀報謂敵謀
於此窺覷欲掠焦湖之舟出從裕溪以瞰江面至煩宣
諭行下措置防拓本司隨即調遣臺項兵船把守終是
隔涉一江不過遙制而已况巢民每遇清野船多迂避

焦湖之中地隸合肥動以帥司臨之使不得專守禦識者病焉按圖志此邑舊為巢州而南渡初張魏公丞相經理淮西亦嘗進軍於此當孫氏有國時每於此進軍以扼魏師蓋其形勢足恃如此今既嚴為江防合於此增屯加備謂宜升為軍壘緩急之際庶可倚重保障急務莫先於此奉聖旨將巢縣升為軍使仍令沿江制司選辟一次續申乞以鎮巢軍為名辟武德郎江東副總管建康府駐劄王珍充鎮巢軍使兼知無為軍巢縣事

仍帶江東副總管建康府駐劄八月二日奉聖旨依
馬光祖申措置下流江防本司被旨通制下流亦既立
通卒分隘兵擺戰艦次第施行矣續據分司孫制恭備
總統湯華申射陽湖通江港汊豈止三二十處惟最緊
河闊水深冬月不涸者七處一曰口岸即柴墟是也二
曰過船港即泰興港是也三曰新河即魏村相對是也四
曰漾港即馬馱沙相對是也五曰石莊河六曰天賜港
七曰通州新河并舊來泰興縣一城每遇潮生通徹城

下或有哨來為其占據返為寇基既不可守只當攤平
如釘塞港汊只可暫為間隔我既可塞彼亦可開兼釘
塞港口徒費民力須當於發源淺狹要路去處如蘆泚
橋下左側六七里用工填塞更填流復溪橋下及將泰
興舊城土攤平填本縣西北門河直至周橋以斷泰興
過船港新河漾港三口子來路等處本職再詳湯知郡
所申得於足歷目擊之審極為詳盡於江防事最有關
係然地分既隸淮東鎮江節制司豈敢越境而問若非

於源頭下手關防直待其侵逼江面與之相持則彼我之勢懸絕客主之權遂分力倍事難居然可見兼射陽既迫漣水賊騎向後出沒不常其中百姓一聞哨警必是各隨所通港汊遷避渡江民導其前賊乘其後倉卒之際着手不及乘間窺伺豈不可憂此事合從朝廷下之淮東制司着緊措置關防當於緊要來路淺狹源頭填塞使支港別汊不可得而通及將泰興舊城攤平使倏去忽來不可得而據然後用防江兵船移寔以備用

那緩以圖急可合者則合可分者則分又將三流之兵
循江上下聯絡氣勢令首尾相應如常山蛇勢彼此救
援然後江面方為牢寔緩急之際委可倚仗允為江防
之幸本職除已就諸隘點視却將數布兵船斟酌緊慢
別行擺泊防拓續容開申外候指揮所據狀申事理備
錄在前本司照得叅議官孫料院備湯知郡所申泰興
縣一帶出江港汊合於近裏措置關防其說利害甚明
合行備申朝廷乞賜割下兩淮制置使司照應施行尋

淮割付沿江制置大使司照應已割兩淮制置使司照
所申差官點視速作措置具已施行狀申樞密院等割
鎮江府節制司一體施行 馬光祖築宜城以固上流
宜城者鴈汭對岸一要害處吳魏相拒時嘗設疑城於
此其後方言訛疑為宜字義宜善於疑故襲稱宜城其
地山從北來分為七枝中短而外長自西南以及於東
則大江環遶其東北隅則有段塘湖水為之限惟北當
備而有大小青龍山可以屯兵而設伏形勢如此而古

今屢城不克者蓋亦有說北隅山高而大城欲包之則不可城於山趾則外高於內非城之利況山骨在此地不可塹故昔人能為疑城而不能城也以二十餘年間事體言之不可不城者有三說大江以北自黃州而下和州而上中間無一城壘以為限隔城戍於此則自黃而和之間聲援易接利一也石簾菩薩石之間江面最狹正在宜城之下曩洶洶時諜知敵謀欲窺此途有城於此戍兵為守則敵有所憚而不敢睥睨利二也自舊

安慶府荒榛之後寓治楊柴洲上鴻鴈飛鳴無城郭可恃舊城既未可修復此地去寓治不遠有險可恃徙民為便利三也不可不城者其利三不可以城其害一此自戊戌以來議而輒沮城而輒止蓋知其利而未知所以避其害也已未庚申之間制臣馬光祖往還江上嘗艤舟而視其地語客曰舊日楊義所築城基址臨張家港之濱客山高而下視之宜其不克城也城外即是山脚宜其不能塹也曷不縮其城而小之移入主山之上

蓋北隅有張家港水通大江秋冬則涸客山在港之北而近主山在港之南而稍遠因注江而為城則視昔為狹然城因山則用力省狹則守之易城在山上則內高而外低險在我矣向所謂客山高而下瞰吾城者不足慮也遠北山之趾而為濠則向所謂石不可墜者亦可避也察其故而未敢決其事會宰臣歸闕舟過其下審其形勢察其利害果不可以不城一見決矣與制閩合入告於上詔光祖城之速其成縻緡錢一千餘萬米十

萬餘石築城周十有三里高二丈八尺趾高七尺頂半
之城門凡七上皆為樓羊馬牆一千二百六十二丈濠
長一千四百三十五丈而與江湖接虢將精兵堅甲利
器戍守其中遂為江上一巨屏有詔獎諭進光祖光祿
大夫任其事者自郡守而下賞有差

詳見詔令錄及侯
牧表制纂官所

作安慶府新
城志尤詳

創寧江新軍景定四年制使姚公希得任內準朝廷行
下泔江建屯招軍防捍務使聲勢連屬其分屯建寨招

軍置將優待犒給撥給軍器衣甲各有條畫

分屯建寨建康太平池三郡江面計一千七十里共
建大小二十九屯建康八屯曰下蜀曰馬家步曰沙
河曰韓橋曰王沙曰新開河曰下三山曰汪蔡港太
平七屯曰濮家圩曰褐山曰采石磯曰白泥浦曰上
三山曰板子磯曰周家莊池州十四屯曰菖蒲山曰
大通曰梅根曰穴港曰戚家溝曰李王河曰寶賽磯
曰黃石磯曰吉陽湖曰祝家磯曰烏石磯曰香口曰

雙河三郡諸屯共創制寨屋一萬一千九十五間本
府一千七百間太平四千四百間池州四千八百間
準朝廷科下十八界六十萬每間科四十貫共支過
科下錢四十四萬三千八百貫外餘錢續建各屯制
領將佐衙屋本府一百三十間太平一百四十六間
池州一百九十五間內本府寨屋每間貼助十八界
二十貫計支過三萬四千貫十八界將佐衙屋不計
焉諸寨內有坐落低窳去處別議合併移改

招刺寧江軍寧江前後軍額六千二百人馬公光祖
刷具闕額凡一千一百七十餘名差將校分頭招募
每一名支等下錢三百貫七事件軍裝一副截至咸
淳元年十一月終共招到一千三百七人

教習寧江軍及束併軍分初寧江分屯二十有九然
少者僅數十人為一屯非所以聯隊伍壯氣勢也馬
公光祖將前後兩軍束併前軍二千六百九十一人
併為八寨後軍二千六百三十六人併為七寨每五

百人置正副準備將不及五百人置正副將然後稍
成將隊各有統紀又因巡江親至諸屯閱習武藝士
皆新募挽弓蹶弩鮮能應格遂遴選江淮精兵發下
各屯夾持訓習不時委官賞錢銀激搞射箭攬槍行
之稍久人漸精熟今秋敵闖濡舒諸屯旗幟鮮明砲
坐森列步騎出入金鼓喧轟其習熟波濤者又操舟
往來上連下接敵隔江覘其有備乃遁去 賞格

紅心

箭一隻支錢五貫文帖箭一隻支錢三貫文垛箭一隻支錢一貫文槍手每攬三百攬支錢兩貫文又各

屯支銀掏一箇一名射中獨得二名以
上均給累給十六中以上補訓練官

招軍置將準朝省指揮將建康太平池三郡闕額六
千二百八十人以寧江新軍為額每人科下身子軍
裝等錢十八界一百貫共科到六十萬遂差官分往
諸郡招募本司招到四千五百一十五人太平州招
到八百五十人池州招到九百一十五人為數已足
總支過六十二萬八千貫十八界建康八屯派撥九
百二十人太平七屯派撥二千三百六十人池州十

四屯派撥三千人建康太平一十五屯為寧江前軍
池州一十四屯為寧江後軍各軍置統制兼總制一
員統制三員正副將各三員準備將六員

優待將士制領將佐本身請給外本司務從優厚差
兼帳前職事添幫月給成年該支錢三萬四百八十
貫舊措米四百四十四石酒一千六百三十二瓶各
有等差其發遣新軍着屯自制領將佐以至官兵等
第支犒共支錢四萬五千二百二十五貫其各屯器

具動用悉與辦集如床薦蓆鍋盆桶二萬三千五百
六十四件計錢一十六萬八千七百二十九貫有奇
其單身人祇給冬衣白布綿襖三千領該錢一十八
萬三千三十八貫又造到旗幟大小三千一百七十
面前後軍各給其半為費五萬八千八百八十七貫
有奇又置惠軍典本一十二萬八千貫應副諸軍急
缺質當不許收息雜賣本錢六萬四千貫以便諸軍
食用不許取利又置碓臼一百四十副分撥諸屯以

便舂伐以至聘娶教閱冬年節支搞及紙劄捉逃菜種等雜費錢通約計三十一萬一千七百二十貫又新軍入營之後多有不服水土病患者與之修合藥餌支撥錢米木炭等選擇醫人優支月給節次差官提點醫治又慮奉行未至分委募屬同醫人將帶生熟藥白米等前去諸屯家至戶到點視醫療通支錢二萬九千六百八十七貫有奇米一百二十七石六斗炭三千五百斤其新軍老小住居各州縣者支給路

費移文各處取發至司遣赴屯所又各支安家路券
等錢及不時差官吏往諸屯點檢撫勞一應券食雜
支截日通用過十六萬二十餘貫又恐諸兵着寨未
久時加優卹差官逐屯支犒共支過錢六萬六千餘
貫舊凡百加意靡不備至焉

給軍器衣甲付各屯樁管以備使用角弓九百四十
二張弩六百二十八件槍一千五百七十條弓箭四
萬七千一百隻弓鞬韋九百四十二箇弓弦九百四

十二條弩箭六萬二千八百隻腰刀二千五百一十
二把弩鞬鞞六百二十八箇手斧六百二十八把金
一十八面鼓四十六面划車弩三十三座甲一千二
百五十六副胖襖一千八百八十四領綿裙一千八
百八十四腰衲襖三千一百四十領衲裙三千一百
四十腰以上共發過一十三萬九十四件內除朝廷
科下殿司
鉄甲襖裙五千九十六件并建康府胖襖綿裙一千
八百八十七件太平州軍器一萬八千五百七十二
件外餘從
本司庫支

制使姚公希得任內勦買戰馬沿江守備雖以舟楫
為要然上流萬一有警牽汴必遲非得精騎疾馳巡
連江面又恐坐失事機舊來此地號為多馬考之尺
籍戎司以數千計馬司以萬計近來減耗百無二三
邊備所關豈容偏廢於是撥一百萬貫專委都統趙
紀祥以買戰馬以備調用自景定三年節次收買及
解捆之日共買到三百一十四匹餘緡椿之司存接
續收買

創建馬寨有馬無屋寒暑非便景定三年制使姚公希得解閫有曰又與措置度地建寨以便牧養據所委官申武定橋東堤岸頭可為寨地遂差濠寨計料創屋八百五十間約費四十五萬二百六十餘緡舊楮米八百一十五石柴五千餘束用四月初三日興工動土間續據白劄條陳寨基卑濕不便欲於北門寨駱駝寨兩處舊基擇其穩便者緣新政將至倉卒未容改作又慮移改增費遂再刷一十萬通前共椿

立十五萬并柴米等一面燒造磚瓦置辦材料責付
所差提點受給官范勝等任責椿管仍備申朝廷乞
劄下新制使照應承續區處高平寨地起蓋廢經久
云

先鋒馬并建寨先鋒軍馬舊管止八十一疋姚公希
得及馬公光祖任內買到三百七十六疋通前共四
百五十七疋初議建寨以便牧養而難其地景定五
年夏四月定卜於南門外沙井頭面勢寬平水草饒

美以是月二十五日經始至九月二十四日畢工為
屋八百七十八間官解廟門樓點亭一一備具續以
人馬數增又蓋屋一百二十六間 寨記南方倚舟
師為長技

北人事鞍馬利馳突南不言騎北不言舟師非習也
雖然用我之長兼彼之長彼以其偏我以其全何戰
不克何守不固哉中興六飛南渡駐蹕全吳天險在
前利在舟楫然是時命吳璘通馬於西胡舜陟市駿
於廣至紹興間李世輔以馬司精銳一日馳安豐會
采石蹙逆亮而斃之其兼用所長之效如此昇左臂
淮右吭浙首枕荆蜀水陸上下之會武備宜畢精制
司舊有先鋒馬軍歷歲久圉牧廢存者不什一余奉
命留鑰始至百廢如蠅毛念未及茲再至則計宿儲
考初籍欲舉而未遂橘州姚公寔來方擢度費務而

余又三至矣先是姚公命都統趙紀祥市馬得三百一十四余不敢墮公志乃益選良駿籍厰毛齒慨聚之之難則廐而牧之其可易遂度地南門之外曰沙井者平坡曼衍水草豐沃河許近則洗之易留芟便則飼之勤迺召匠經始程土物量事期計徒庸主費有司護作有校役始於景定甲子四月至咸淳乙丑正月成列楹一千有四縻緡錢一十一萬五千有奇米八百二十三石有奇費一出於制帑役成昇人不知因念隆興乾道間張虞二公志在規恢士馬精壯馬司移屯自茲始也余老矣方將為伏櫪想何敢望二公然力不足意有餘倘尚此一日留尚當彈一日力謀多務廣終求以足余意而亦以成姚公欲為未竟之志焉異時馳勁騎三千蹠血虜庭不肯以天限南北一語掛牙輔知必有不負余志者姑識諸石以俟觀文殿學士金紫光祿大夫沿江制置大使兼知建康軍府事兼管內勸農營田使兼江南東路安撫

大使馬步軍都總管兼行宮留守節制和州無為軍
安慶府三郡屯田使兼權淮西總領金華郡開國公
食邑四千一百戶食寔封八百戶馬光祖記并書朝
奉大夫秘閣修撰江南東路計度轉運副使兼本路
勸農使借紫
趙孟頫篆蓋

買寧江軍戰馬景定五年九月馬光祖準省劄行下
每寧江軍一千人以二百人為騎軍前後二軍共合
辦馬一千二百五十六疋江南非產馬之地措置收
買為力倍難所得之馬皆擇其齒嫩格高者鞍轡槽
具色色齊備分派諸屯使善騎者訓習弓矢矛稍各

有執藝今餘半年馳驟施放大略可觀緩急足為戰

禦之備

寧江前軍六百二十八足第一將沙河寨一

寨三十六足第三將褐山寨八十足第四將烏石港

寨八十三足第五將上三山寨九十一足第六將板

子磯寨一百足第七將周家莊寨九十八足寧江後

軍六百二十八足第一將菖蒲山寨八十足第二將

梅根寨一百足第三將戚家溝寨八十足第四將李

王河寨一百五十八足第五將吉陽湖寨六十四足

第六將烏石磯寨八十三

足第七將香口寨六十足

景定建康志卷三十八

欽定四庫全書

景定建康志卷三十九

宋 周應合 撰

武衛志二

尺籍

營寨已具
城闕志後

建康府廂禁軍隸安撫司元額四千人親兵一千人

禁軍一十一指揮元額一千五百人 鈐轄司五指

揮馬軍指揮忠義指揮全捷第一指揮威果四十

四指揮橫江水軍指揮 將司六指揮威果十三

指揮威果十四指揮威果十五指揮金捷第六指
揮忠節十一指揮武雄第一指揮

廂軍四指揮元額一千五百人 効一指揮効二指
揮牢一指揮牢二指揮

親兵一千人係禁軍內撥到

建康府駐劄御前諸軍隸都統制司兵五萬馬五千八
十七疋

紹興初張循王俊將帶所部神武右軍人馬前來建

康府駐劄後改充行營中護軍起發泗州紹興七年
復回建康至十一年四月內奉聖旨改充御前軍立
名都統制司續于節度使王德任內準密劄以五萬
人馬五千八十七疋為額遊奕前右中左後六軍每
軍各置統制官一員統領官二員正將五員準備將
五員錢糧係淮西總領所幫給

遊奕軍 前軍 右軍 中軍 左軍 後軍

侍衛馬軍移屯建康府以三萬人騎為額

乾道二年正月二十八日奉旨以二萬八千人為額
六年四月十五日李舜舉奏乞以三萬人為額奉旨
依七年三月太尉威武軍節度使王管侍衛馬軍司
公事李顯忠奉旨移屯建康

選鋒軍三千五百人馬八百疋統制官一員統領官
二員正將二員副將二員準備將二員

前軍三千人馬六百疋統制官一員統領官二員正
將三員副將三員準備將三員

右軍五千五百人馬八百疋統制官一員統領官二員正副準備將共一十七員

中軍五千二百人馬八百疋統制官一員統領官二員正將六員副將六員準備將六員

左軍五千八百人馬八百疋統制官一員統領官二員正將五員副將五員準備將五員

後軍五千八百人馬八百疋統制官一員統領官二員正將五員副將五員準備將五員

沿江制置司增置軍額

防江軍三千三百人內步軍三千人

勝捷五百人吐渾一千人雄威

一千五百人

馬軍三百人騎

嘉定十七年十一月三十

日準密劄勘會建康府係沿江重鎮合行增屯兵馬以壯聲勢須議指揮十一月初八日奉旨令沿江制司日下措置招刺步軍三千人馬軍三百人騎並聽沿江制司節制步軍並刺充三色軍兵勝捷五百人吐渾一千人雄威一千五百人馬軍三百人並刺充

次等効用

其馬軍三百人騎步軍一千人理作建康府都統司闕額六千人理作馬軍司闕額

本軍統制官一員統領官一員正將四員副將四員

準備將四員

効用軍一千四百五十五人 紹定元年十二月因

逆全為亂趙大使善湘申請朝廷招募効用軍一千

四百五十五人理填騎戎兩司闕額放請

破敵軍一千四十四人 嘉熙元年四月陳制使驍

申請於朝取發福建兩浙江西湖南諸郡土牢拘鎖

人揀選彊壯赴本司面刺雙旗借理諸軍闕額放請
立名破敵軍自後逐時又將所部去處曾經作過及
犯盜彊壯堪以充軍之人一例刺旗發下破敵軍收

管放請置立將隊選差制領將佐訓練官合千人部

轄

密劄沿江制置使司申照得本司累準朝廷指揮
招軍填額緣沿江就招率是游手緩急無用近嘗

以福建八郡土牢人申請乞行下安撫轉運兩司揀
擇前來驅用又竊見江西湖南乃峒寇接連之地販
負茶鹽犯法尤重罪不至死必至縲紲兩浙州郡亦
有劫盜私犯作過拘繫之人內地無用徒費糧食而
彊悍之人囚首待盡終無洗濯自新之路不若驅之
軍前使効死力其與招收脆弱未習武藝者相去甚

遠欲乞朝廷嚴賜立限割下兩浙江西湖南諸郡各處守臣將土牢拘鎖人揀擇彊壯選有心力官員部押優給路費發付本司早得撫養訓齊使成一軍為秋防用寔為兩便右謹具申樞密院伏乞指揮亟賜施行中間事已割下兩浙安撫司湖南安撫司各從所申事理行下本路諸郡守精加揀擇彊壯委可備戰闕役之人不許以老弱病幼者充數候有揀到人數責委有心力官部押前去沿江制置使司交管仍須管嚴加督責在路謹守紀律毋令稍有違犯及生事搔擾起程一日先具遵稟及已作如何措置仍陸續具起程日時元犯申樞密院外右劄付本軍統制沿江制置使司從所申事理施行準此

官一員統領官一員正將一員副將二員準備將二

員

精銳軍二千五百三十一人 淳祐七年都督趙葵

給旗榜于兩淮等處招募農業彊壯創立軍將理幫
騎戎兩司并策勝防江軍名請本軍統制官一員統
領官一員正將四員副將四員準備將四員

親兵左右部共一千人 淳祐七年樞密陳韡招收
沿江諸沙一帶彊壯淮民幫四百例請給帶行湖南
潭州駐劄立為行府親兵鎮壓峽峒九年陳樞密結
局具申朝廷將上項七百人撥隸沿江制置司收管

聽候調遣本司續招彊壯三百人湊作一千人為額
本軍統制官一員統領官二員正將二員副將二員
準備將三員

策勝中右二軍元額二萬人

淳祐五年八月密劄勘會朝廷近已行下淮東兩制
司沿江制司沿江副司京湖制置大使司湖南安撫
大使司淮西招撫司淮西安撫司浙西兵船司太平
州節制司共招募遊擊軍三萬人今來陸續將已招

到人數分解屯劄之所八月十二日奉旨以御前策
勝為名其三萬人分為前右中左後先鋒六軍每軍
五千人差統制一員內前軍左軍屯劄鎮江府右軍
中軍屯駐建康府先鋒後軍屯駐池州仍聽各郡守
臣節制劄付建康府節制司施行

中軍五千人統制官一員同統制一員統領官一員
正將二員副將三員準備將三員

右軍五千人統制官一員統領官二員正將三員副

將五員準備將五員

制効兩軍元額二千三百二十六人

元係兩淮土著稅戶因金兵連年侵擾避地諸沙端
平三年間制置司差官撫恤招募湟刺充民兵制効
軍理騎戎兩司闕額幫放次等効用二百食錢請給
分為十部差置制領將佐管幹赴應差調續於淳祐
十年內本司以諸部零抽不成軍分具申朝廷併作
兩軍每軍立為四將給降制領將佐付身幫行供給

第一軍一千一百一十人

第二軍一千二百一十六人 各軍統制官一員統領官一員正將四員副將四員準備將二員

靖安唐灣水軍元額五千七百二人

靖安水軍于淳熙十三年三月內移撥采石水軍一將二千五百人前來靖安鎮屯駐並理建康府都統司闕額續於嘉定八年七月創置唐灣水軍二千五百人並理馬司闕額嘉定十四年十一月內準密劄

備奉聖旨唐灣靖安兩水軍合併一軍差置統制統領各一員嘉熙二年以後創置寄泊新軍七百二人理騎戎兩司闕額

龍灣遊擊水軍元額二千九人

紹定三年招刺理填馬司請給

金山團窩制効軍元額六百五十九人

元係兩淮土著稅戶因金人連歲侵犯避地江南都督趙葵任內委官團結充民兵制効半年軍前來地

名金山莊園窩屯駐淳祐九年委官下沙勸諭捏刺放行全請並理都統司闕額

遊擊軍五軍共一萬二千四百一十二人

寶祐四年制使馬光祖奉朝旨創招遊擊軍四十人寶祐六年制使趙與簾續招三千餘人開慶元年馬

公再至又增招五千四百餘人通前共招萬二千四

百餘人增給衣裝等下錢

每名給等下錢三百貫青紗頭巾一頂布衲襖一領

小布衫一領都管皮一條布袴一腰靴鞋一雙脚絆一對並常官給付二般家錢利物等

每名般家錢并起發券食錢共一百三十貫文銀環一對花一枝紅斑絹十段作新寨以安

其居

詳見

營寨支婚嫁錢酒米帛以樂其家

每名支錢一百貫酒四瓶

米一碩一疋

撥典本錢二十萬貫以濟其急

內二十萬貫不起息應副

軍士急關借用

撥營運本錢一十萬貫以其息佐軍用酒庫

藥舖靡不備具請於朝以御前遊擊軍為額乞置都

統制一員五軍統制統領官各一員

內在軍增統領一員

正副

準備將各一員

前軍 右軍 中軍 左軍 後軍

雄武軍五百八十七人

景定元年正月內江東宣撫大使司創招此軍寄泊
精銳軍本軍統制一員正將二員副將三員準備將
三員

義士軍一千八百七十三人

開慶元年十月內大使馬光祖創招彊壯膽勇之人
立名義士軍每名支軍裝錢三百貫贍家稻一十碩
日支十八界三百文米三升節次調遣上流景定元

年五月抽回寄泊遊擊中左後三軍

良家子

開慶元年十月大使馬光祖招收土豪壯士材武出衆之人充良家子優賞格以勸其來精閱習以程其能軍裝錢并特支錢每名四百貫文日支十八界四百文米三升

寧江新軍六千二百八十人

制使姚希得任內新招

附見江防內

新招帳前將官

景定三年八月姚尚書任內撫司準樞劄奉宣諭指揮行下江東九郡招募不湏寄請將官共募到三百單六人

建康府一百一十一人 太平州三十三人 寧國府二十一人 池州六人 徽州四人 饒州六人 信州九十三人 廣德軍二十八人 南康軍四人 內本府招到人各支紵絲一疋青絹

搭膊一條并等下錢計三萬一十五貫酒二百二十瓶外每人月給錢一百貫米一石至五年三月計支過錢一十七萬七千六百貫通前總支過二十萬七千六百餘貫米一千七百七十六石除節次揀放至是本府見管六十六人令行移未已重新中軍教場亭

閱武所在軍務係馬屋老且狹弗稱大閱景定三年制使姚希得任內遂撥松木城磚等物委都統趙紀

祥鼎新初蓋比舊展開增高為屋計二十四間結築
將壇布甃堦面廊牆回合丹牖完備總費錢二萬六
千九百七十餘緡磚木不與焉

制使姚希得任內修甃諸營寨水井

景定四年十一月初三日準銀牌批判訪聞諸營寨
甃井少土井多土堙水渾汲水不便仰各軍統領契
勘見在井數如甃井渾臭者即與淘浚土井崩壞者
即與甃砌人稠井少去處即與添鑿庶幾軍中省遠

汲之勞來春免癘疫之疾限一月區處申不許文具
後據所差點視官韓明申除堪好不必修者外有五
百九十六眼當修隨其損壞多少給錢有差總費一
萬六千九百七十貫

大使馬光祖到任將例冊犒給軍民

乙卯開閩鈞判昔謝尚為建武將軍能壞烏布帳以
為軍士襦褲當使於前修無能為役然損已利人心
庶幾焉分閩以來內省望薄無以上報君恩下副人

望豈敢尚循故例安受例冊自當使到任送到例冊并備堂公用器皿見錢等約計一十八萬三千貫更闢宅庫撥湊二十萬將合赴教射射諸軍均搞一次已米再至并及諸廂人戶至是復舉舊例行之

省罷冗員以其俸給寧江軍制領將佐

大使馬光祖景定五年六月闕日準樞密院劄子備

本司申照得安軍士之心者莫若擇撫循之將厲接克之禁者不若厚廩稍之給年來軍校俸入無幾物

價騰翔米鹽之靡密妻孥之供贍未必不取辦于諸
軍甚至受錢以買閒私役以營利以故貧者不容於
不病病者不容於不死不病不死不逃何待是固管
軍者之責循流遡源亦由俸廩微薄不足以自給故
也母已則稍增其俸然為數浩瀚日引月長一時行
之後將安繼展轉而思惟有去無益而就有益省去
無用而為有用其於責實之政庶幾有補今照得建
康府總管鈐路正副將等闕添差猥衆往往多是不

堪任事之人前任未滿又於再任請給人從悉同正
官委為帑廩之蠹今縱未能盡汰亦當就內節省照
對總管除正任一員歸正二員外添差八員今欲省
罷四員存留四員路鈐除正任一員外添差者七員
今欲省罷三員存留四員州鈐除正任一員歸正一
員外添差者三員今欲省罷一員存留二員路分除
正任一員歸正二員外添差一十二員今欲省罷六
員存留六員正將除正任一員歸正三員外添差八

員今欲省罷四員存留四員副將除正任一員歸正
四員外添差者五員今欲省罷二員存留三員準備
將見任添差一員仍舊却以省到各官每月所請錢
米添給寧江新軍制領將佐庶幾稍有顧藉不至拮
克如蒙朝廷矜允所申乞賜敷奏劄下本司照應仍
關合屬去處其已省罷者見任人聽令終滿已注下
者別令注授伏候指揮朝廷照得此項省罷添差等
官以增制領將佐月俸劄送本司照應仍具已減員

數錢米與今來增支數目申令開具省罷創置員數

下項

省汰共二十員 添差總管四員添差路鈐三員添
差州鈐一員添差路分六員添差正將四員添差副
將二員

創置共三十八員 統制二員統領四員正將十
四員副將十四員準備將四員

招募在府諸軍闕額

咸淳元年五月十九日大使馬光祖判云諸軍近日
闕額頗多有妨差調合行下諸軍任責招募須要各
等每勝捷一名支二十貫吐渾一名支十六貫雄威
一名支十二貫截日終共招到一千九百八十九人
招募水軍

咸淳元年閏五月二十九日馬光祖判云差人招軍
多是拖扯生事今所招水軍合行下鎮江許浦兩戎
司澈浦水軍各任責招三百人能船能水刺勝捷支

等下錢六十貫能水不能船刺吐渾支四十貫能船不能水刺雄威支二十貫仍各支五事件軍裝一副截日終已招到

諸軍婚嫁

大使馬光祖先未開閭嘗行下諸軍應有女年十四歲以上及孀婦無依願再嫁者許就諸軍擇年紀相當之人議親每一名支十八界二十貫米一石絹一疋酒四瓶至是復照舊例行之

提兵勦逐安慶無為虜哨

咸淳乙丑秋八月金重兵由豐廬入寇侵無為境甫
三日奄至安慶城下奸謀叵測本司先已節次調兵
守禦至是大使馬光祖親提舟師以十五日發龍灣
二十三日抵安慶敵酋登山遠望舳艫銜尾戈甲耀
日數十里不絕呼被擄者詰之或告之曰此馬相公
軍馬也於是震懼喪魄偽立排架一夕遁去上親御
翰墨獎諭九月十六日班師解嚴

軍器

除戎器戒不虞傳於易礪鋒刃鍛戈矛誓于書修車馬
備器械序於詩有備無患其來尚矣漢帝使人視吳漢
何為方修戰攻具乃有隱若一敵國之嘆祖逖用二千
人起冶鑄兵固知其有誓清中原之志李德裕請甲人
於安定弓人於河東弩人於浙西於是兵器皆犀利而
蕃外不敢窺焉修政攘夷茲非急務乎我朝建閫金陵
藩屏畿甸兵甲四出則北援淮東備海南控荆楚西助

巴峽開慶景定間凡甲冑戈劔弓矢之需取具於昇者
無慮數十萬計取之不竭備有素也先是寶祐丙辰馬
光祖為制使首措置軍器庫己未以大使再至則鼎建
都作院無日不討百工皆精而器愈備焉姑志其凡於
左

軍器庫措置條目已列於諸庫之編

都作院記

戎器為戰守要務尚矣金陵國家陪都襟江帶淮虎視京洛常宿重兵根本三邊有

警水行陸驚百道竝出戈矛劔甲累鉅萬計率頃刻立具用廣數夥以故繕治益急作院舊在郡治之東

南青溪地墊隘沮洳屋老欲壓數議改初未果觀文
殿學士制置大使裕齋金華馬公再鎮之三年政通
力紓百弛具張廼即故址撤而新之謂幕客朱君幼
學敏毅有幹局俾課役培土石增其崇取旁廢營地
益其廣表以門繚以長垣聽事所中居翼以重廊鍛
礪刮磨綿絡弦甲筋革之工凡十有二列于左鎔冶
麻縷竹木骨角設色之工凡十有六位於右帑藏祠
廨先後環擁大都百三十有三楹臚分棋布相望如
引繩宅幽勢閒夏淒冬溫視昔人治城鑄兵規制
畧同縻金錢若干緡粟若干碩各有奇役始景定二
年四月甲午成五月戊辰居佚藝生器以犀利無有
苦窳吁盛哉公之精神思慮知周曲成如此引而伸
之可以用天下矣且天下一器耳政其工人其材心
其彌綸範圍之鄉也含茹至廣大經緯至微密萬物
備百工具故君子先治心為之地猶斯宇之虛暢洞
達工師得以藏修夷愉也輒治人猶工之用五材度

五則以致其美畢其巧也輟平天下則器之成而勿壞也考乎此為考工記攻乎此為車攻詩除乎此為除戎器戒不虞之萃器耶抑道耶其利無前而長鍛為頃其捷無方而弩羽為緩于戰守乎何有信乎公此舉可為佐天子用天下法矣公授簡之翼不敢辭因衍迤其義為記門生承事郎特改差充沿江制置大使使司幹辦公事家之翼撰門生儒林郎宜差總領淮西江東軍馬錢糧所準備差遣趙與鑒書門生通直郎特差充沿江制置大使使司叅議官王起晦篆蓋

寶祐二年終見管舊軍器二十七萬二千五百四十

一件

鐵甲身七千八百四十七領鐵頭年六千五百七十一頂鉄披膊八百五十九副角弓一萬五

百九十七張角弩稍四百八枝毛翎弓箭六萬四千六百八十五隻竹翎弩箭八萬六千六百四十三隻

黑油弓箭鞞韃五千四百八箇黑漆弩箭鞞韃三千
四箇黑漆拷棹子二萬四千三百五十二箇手刀皮
鞘一萬二千一百二箇黑漆弩椿一千九百九條手
刀八千五百九十二把擇刀六百七十把鐵叉四十
把金三十七面黑油弓袋箭鞞韃一百六十五副擇
刀皮鞘四百一十四箇黑漆皮馬甲一副炮砂一千
三百二十八箇隊鼓三百二十一面紅布衲襖五千
八百三十一領紅布衲裙二千七十三腰黑布衫五
領黑布綿衲裙一千五百三十五腰紅布綿絮軟纏
襖五千七百六十三領皂綿紙台帽子一百六頂紅
布紙台帽子五千三百二十四頂黑布紙台帽子一
千三百二十六頂金褐布衲裙五千九十九腰豹班
布帽子二千九百二頂車鼓七面紅布衫一十領鞭
箭鞞韃三百箇小皮竹牌一百一十五面大斧三百
九十二具黑油
長鎗六千條

寶祐三年八月二十七日至寶祐六年正月二十六
日制使馬光祖任內初造及添修共三十六萬七百
三十二件

內初造三十七項共八萬八千一百九十一件

倒穿

鉄甲身五百領倒穿鉄頭鑿五百頂鉄披膊一百
八十副角弓絲弦一萬一百八十條射親弓箭五
千隻射親弩箭五千隻毛翎弓箭三萬隻毛翎弩
箭二萬隻破陣刀五百把虎斑皮鞘全炮砂五百
箇紅布綿絮軟纏祇一千領紅布衲祇九千一百
七十九領木弩麻弦一千五百條鼠尾解扎綾二
千五百副扮拽木弓五百五十張羅圈皮甲二副
頭鑿一頂梯兒角弩二弄弦索事件金銅刀一把

金絲褐布衲裙二千腰掠陣刀二把皮鞘全腰刀
二把皮鞘全狼牙棒二條山字叉三把羊頭叉一
把月斧三把黑油弓箭鞞鞞鞞鞞鞞鞞鞞鞞鞞
一箇金褐布衲裙一領黑漆腔隊鼓一面天王等
旗三十二面槍頭拒馬子五十座砲線五十條車
鼓六面車鼓架子六座金鼓袍兒六十領黑油敲
棍一百條破甲錐槍一千二百九條茅葉槍二千
一百條朴刀槍二千八百條改穿鉄甲月七百三
十六領鉄洒鞞穿鉄甲月九百六
十四領鉄頭鑿九百六十四領

內添修三十七項共二十七萬二千五百四十一

件

細數見前
項舊管

寶祐六年三月二十一日至十二月二十二日大使

趙與憲任內勦造及添修共七萬一千一百六十二件

內勦造二十一項共三萬一千二百六十八件

倒穿

鐵甲身六百七十九領倒穿鐵頭盔六百七十九
領紅油破木槍四千四百條黑漆四道紅木弩八
百三十五枝角弓絲弦四千九百五條弓箭鞬韉
一千箇紅麻鼠尾線四百五十條紅麻解扎線四
百五十條紅油食簷二百六十隻炮砂五百箇角
弓一百張廬筒椿弩五十弄計三百件廬筒弩椿
一百五十條鹿耳子一百五十個弩箭四千隻弩
箭鞬韉五十個紅布小綿袄五千五百領雜色間
道旗三百五十五面紅麻突頭三百五十五個紅
布衲袄一千領兩浙諸郡代軍號月子五千一百

五十
个

内添修三十二項共三萬九千八百九十四件角

四千張黑油木槍七百條紅布綿絮軟纏袂一千
五百三十六領紅布衲袄九千一百四十四領紅
布紙台帽子一千七百个金褐布衲裙一千五百
腰拷拷子五千二百八十个豹斑布紙台帽子六
百三十五个隊鼓七十六面黑布衲袄四千四十
二領黑布衲裙一千腰鐵甲身一千一十二領刷
染紅布衲襖一千九百三十五領鉄頭盔七百五
十五頂紅油木槍四十一條手刀一千三百一十
五把大斧七十六具木弩椿八條棒刀皮鞘一百
一十三个手刀皮鞘二千九百七十四个弓箭箭
韋七百九十六个牛皮竹牌四面炮砂三百三十
六个鉄鉞二百四十八把鉄鏤一百三十六把鉄

披膊七副 棒刀三十六把 弩箭 鞬鞞一百三十五
个 角弩三十枝 劍刀一百三十四把 夏射本弓一
百張 扮拽木
弓一百張

開慶元年四月十三日至景定二年七月大使馬光

祖任內勦造及添修共三十萬八千六百六十五件

內勦造五十一項共六萬二千六百二十五件

鐵甲

身三千六百六十四 願鉄頭盔一千一百一頂 紅
布衲袄四千領 黑布衲襖三千一百五十領 破甲
鎗二千三百五十六條 大朴刀五千三百八十
條 紅油靶手刀三千五百把 弓弦一萬五千五百
八十三條 梯子弩絲弦四千二條 茅葉槍八百五
十六條 小朴刀槍一千三百八十八條 硃紅油大

朴刀槍一百條白油麥穗槍二百條白油大朴刀
槍一百條硃紅漆靶面刀一百把皮鞘全梯兒
刻車弩床一十座校棒四十二條梯兒弩繚四十
二弄砲繚七百五十條黑油敲棒五百條四道紅
木弩枝一千二百八十條黑漆木弩椿一百五十
條弩絲繚二百四十條毛翎弩箭三千隻黑漆弩
箭繚三百五十個紅麻鼠尾繚一千四百三十
條紅麻解扎繚二千一百五十條鹿耳子一千二
百五十個黑漆拷梔子七千個角弓四百張弓箭
繚五百個破鋒刀一千把皮鞘全硃紅油靶破
陣刀三百把皮鞘全水弩麻弦一千五百條扮拽
木弓五百五十張黑漆柄大斧一千具摔刀皮鞘
五百個白木槍五百條紅布綿腿裙五百腰紅布
紙台帽子二百頂黑布紙台帽子一千頂都管皮
五百條鉄披膊七百二十副黃布衲袂三百五十
領黑布衲裙一千腰虎斑皮鞘九百個木弩椿一

百三十條紅麻鼠尾繚七百二十條弩
麻弦二百四十條紅油食差四十隻

內漆修三十一項共六萬四千三百六十三件

鐵甲

身九千九百九十領鐵頭盔一萬一千七百二十
一領紅布衲袂一千五百領黑布衲袂一千五百
領紅布綿絮軟纏襖三百四十領黑布紙台帽子
五百頂白木夏射弓七十五張角弓一萬七百四十
十三張角弩一千三百五十九枝手刀六千六十
九把隊鼓三百四十三面炮砂一千八十三個黑
漆拷棹子七千一百三十九個掠陣刀七百二十
把棒刀三百四十三把鋤刀二百三十九把手斧
二千六百九十八具紅木槍四十五條神臂角弓
一百一十六張黑油弓箭箭翎四千三百九十个金
一十五面黑漆弩箭翎一千六百四十八个手
刀皮鞘七千六百三十四个鹿耳子三十八个皮

竹牌七十四面
摔刀皮鞘三百四十三个
黑漆弩
椿二百八十一條
鉄鍬六百一十九把
鉄鑊二百
八十八把
伍勝划車角弩七十八枝
掠陣刀皮鞘一十三个
破鋒刀四十二把

又造軍裝共一十一萬七千八百九十三件
月解

三萬五千二百八十四領
衲裙二萬六千八百六
腰胖袄九千九百六領
綿裙八千九百七十二腰
帽子一萬六千七百六頂
褐絹衲袄五百八十二
領
鞞鞋二千雙
撥補衲袄一千八百七十二領
招軍黃布衫五千四百一領
綠布衫二千二百二十
七領
紅布手中二千二百一十七條
小布衫三千
六百九領
麻布袴四千六百六十六腰
膝袴
子三千八百八十四雙
青紗頭巾五百頂

又剏造添修火攻器具共六萬三千七百五十四

件

內敍造三萬八千三百五十九件

鐵砲殼十斤重
四隻七斤重八

隻六斤重一百隻五斤重一萬三千一百四隻三
斤重二萬二千四十四隻火弓箭一千隻大弩箭
一千隻突火筒三百三十三箇大蒺藜三百三十
三箇大藥棄袴槍頭三百三十三箇霹靂火砲殼
一百隻

內添修二萬五千三百九十五件

火弓箭九千八
百八隻火弩箭

一萬二千九百八十隻突火筒五百二箇大藥棄
袴槍頭一千三百九十六箇大藥蒺藜四百四箇
小鉄砲二百八隻鉄火桶七
十四隻鉄火錐六十三條

制使姚希得任內令項置局造萬人軍器

除戎器
戒不虞

分閭者當加之意本司作院逐年所造固有常規近來應副荆蜀等處調遣支撥不一器械之備不厭其多於是令項置局製造萬人軍器如鉄甲胖袄帽子衲袄腿裙長槍大朴刀槍手刀手斧角弓木弩旗幟金鼓栲栳之屬總八萬七千五百五十件專差遊擊右軍統制張武等監造貯以別庫用備不測調遣事非緊急毋得輕動物料共費二百二十一萬餘貫鉄炭米之類不在焉自景定四年十月下手及解閩之日共已造到二萬七千一百九十六件餘緣及物料椿之司存接續置造

初新造解內軍器庫鉄甲 景定三年姚尚書任內

準密劄行下每季造解五十副自當年冬季為始本

府備土物錢計一萬八千餘貫附制司作院造解行
在內軍器庫至景定五年春解六季訖每季計腳費
一千九百四十三貫舊會

初造新軍衣襖 新屯寧江諸軍本府所當添辦軍
裝遂行下作院造辦胖袄綿裙布帽各一千件工物
共該六萬六千四百三十貫舊會

大使馬光祖任內修初一應軍裝軍器及火攻器目
等 本司軍器逐時開支回戌拘收類損失多以是

創新修舊列無寧時今具截日終造到修到軍器軍
裝甲冑火攻件項共闕

戰艦

李忠定公綱嘗奏於高宗皇帝曰臣聞生於陵者安於
陵生於水者安於水南方之人習水而善沒其操舟若
神而北人有懼舟楫而不敢登者習與性成也騎兵施
於南方非所便而南人教之水戰必可取勝昔曹操以
數十萬衆順流襲吳而周瑜以三萬人逆戰於赤壁因

風縱火焚其船棧遂大破之操自此不敢有窺江表之心而鼎足之勢立其後曹丕復以大兵收廣陵觀長江風濤洶湧吳人戈甲旌旗之盛恐懼而退晉有江左苻堅以百萬之衆次淝水而謝玄以八千人破之衆皆奔北聞風聲鶴唳皆以為王師將至則東南之兵養育訓練因地利而用之亦足以自守其地應沿河沿淮沿江帥府要郡凡臨流去處宜倣古制以造戰船上設樓櫓可以施弓弩下運艫棹可以破風濤頒法式以授之仍

募習水者為水軍以時教閱激賞賊舟濟渡會合掩擊以我之素習擊彼之蹙濟其勢必勝得一勝則賊必破膽不敢有窺東南之心矣嘉祐中范仲淹上言乞於河陽置戰艦水軍以防契丹當時以為迂濶不果行使用其說初設至今則大河有備靖康初金人豈能遽濟渡哉先事而言則近乎迂事至而後圖之則無所及其寔今日之急務也所有諸路合置戰船募水軍欲乞專差官前去措置

建康府制置司累政修造戰船舊志續志皆無所紀自

淳祐九年以後大略可考造船修船共三千五百五十

隻

造新船共八百五十七隻修舊船共二千六百九十三隻

都督趙葵任內淳祐九年二月終見管船四百二十

二隻

車頭船五十隻飛捷船五十隻漿船九十九隻板船一百八十隻鉄頭船一十隻羅框船三隻

脚船三

十隻

制使吳淵自淳祐九年二月開閩在任三年造新船

八十隻

鉄鷄船五十隻柴舫船二十隻馬船一十隻

修舊船四百餘隻

制使王埜自淳祐十二年四月開閩在任三年四箇

月造新船一百二十隻

多棹船一百隻車頭船一十隻脚船十隻

修舊船

四百七十七隻

制使丘岳自寶祐二年八月開閩在任一年造新船

五十二隻

小富陽座船一隻脚船五十一隻

修舊船二百五十八隻

制使馬光祖自寶祐三年八月開閩在任二年半造

新船一百五十三隻

申省狀照對本司見管戰船除添新補舊之外欠數尚多今措

置那撥官錢專差靖安唐灣水軍統制郭俊將帶工匠前往江西吉州置塲收買材植物料打造三百料

四槽海船五十隻三百五十料四槽富陽船五十隻
所費幾及百萬不敢遽申朝廷科撥且於本司諸項
窠名錢內那撥前去竊照江西一路不隸本司節制
竊恐所差兵將道里生疎未能辦集或致抵牾徒老
日月所合具申朝廷乞賜割下吉州照應仍就差本
州陳道判任責提督庶易辦集造到船數四槽富陽
船五十隻各三百料四槽海船五十隻各二百
五十料富陽船一隻五百料脚船五十一隻 修舊

船四百七十七隻

申嚴修船約束當使前日曾親到
船場見得全然浩散無統合專令

劉準使坐局監修陳路分專充受給所有書擬船場
一行事務委孫制幹胡制參別立規模須管以日計
効修到船數車頭船五十隻富陽船二十隻四車船
三十隻多棹船二十隻漿船五十隻板船一百九十
五隻鉄鷁船二十隻柴舫船二十隻飛捷
船三十隻鉄頭船一十隻脚船四十二隻 撥助屬

郡造船錢

鎮江府兵船雖有專司然江面關係不小所有兵船除本司已為管認三十隻其餘

合係都大兵船司修葺訪聞本府事力有限誼同一家無緣置而不問本司助錢一十萬貫文專人牒押赴鎮江府都大司交管作急趙修仍申樞密院照應采石戰艦見此修葺雖是本州之責竊恐事力有限一時不能副速當使襄以當塗兼領所事多是搏節二釐庫餘錢添助工費今契勘本所二釐庫支遣之外所餘無幾然不過支給官吏并以分發解發朝省此外或有些少寬剩不當妄有支用且於現在二釐雜收錢內撥一十五萬貫文牒太平州收管專一打造采石戰船仍劄遠路分主兵官申密院尚書省太平鎮江兩處本司已行支助池州事力其寔不能及當塗而提舉知郡守簿自能撙節創造前事已為申聞今又欲接續為之雖無假本司之力而本司寔自不容阻已特助五萬貫仍申尚書省照應併劄

池州催鎮江府計撥錢一十萬貫文太平州計撥錢一十五萬貫文池州計撥錢五萬貫文修造兵船本州之責當使曩守當塗皆是搏節浮費躬自為之未嘗干瀆于朝亦未嘗請于制司至今采石江防猶獲其利但鎮江凋弊財計匱乏積非一日又難援此為比只得彼此相體今於八十三隻內本司自為包認修葺三十隻行下張斌監督日下興工其餘船隻仰本府任責仍申朝廷乞于已支降一十萬貫外更與料降底幾不至悠悠推抵以致誤事增修到護沙船一十一隻許司船七隻激浦板船二隻金山板船一隻棹船一隻江陰軍板船二隻運司漿船五隻

大使趙與憲自寶祐六年三月開閫在任一年新造無修舊船三百四十七隻

大使馬光祖自開慶元年四月再至開閩至景定二

年五月以前造新船五百五隻

水哨馬船四百五十隻
漕湖船二十五隻

輕捷多漿船五隻
脚船二十五隻

修舊船二百七十五隻

制使姚希得任內新造水哨馬船二百隻

江防要務
戰艦為先

舊來多是大舟緩急難於運棹自開慶敵騎渡江我
師嘗以水哨馬小舟破敵取勝允為便利時雖無虞
備豈容弛於是撥錢百萬收置物料差水軍統制張
超置場打造自景定四年二月初九日興工至四年
十二月十一日竣事本司準遣李子龍專一
書擬程督其事以勞賞免常員舉主一人

景定二

年十一月十三日興工至景定三年四月初九日造

過大樣多漿船三十四隻

每半年一奏
申案牘具在

景定二年十

一月十三日興工至景定五年三月十五日修過大

小船共五百一十四隻

每半年一奏
申案牘具在

大使馬光祖咸淳元年第一次打造水哨馬船三百

隻本司船隻籍管雖多堪用實少開闢之初首那官

錢九十萬貫發下諸處併手打造新樣水哨馬船三

百隻繩蓬貢具色色齊備續準閏五月空日密劄將

上項船併於本司簿管船內撥一百隻共四百隻發

赴兩淮制司聽候調用當即差水路撥發官張超管押前去淮閫交管

大使馬光祖第二次造板船併水哨馬船共二百隻自準朝命撥船四百隻赴淮閫調用在岸之船無幾委官分別有多年損壞不堪修補者計二百七十四隻遂申朝廷乞行打折選剔堪好釘板為修船用庶免盡為棄物劄報從申尋分料次打折而歲月深遠風雨剝蝕可用船板十無一二遂委叅議官毛洪權

詔議官王雄專一提督別造新樣護膝板船二百隻
大使馬光祖第三次江西打造水哨馬船三百隻咸
淳元年十一月十五日鈞判水哨馬船以多為貴差
官往江西產木地頭更打造三百隻續差帳前提舉
劉選點檢文字王又新準備將張富專一監造準備
將朱珍受給先發十八界一十五萬貫文又支一萬
貫打造大樣使座船一隻

大使馬光祖重修大小船在籍之船隨修隨調修數

非不多而緩急常窘於乏用開閩以來即分料次選
官董修每五十隻為一料截日終計修過關料為船

關四字

隻又額外增修

關四字

隻兩項總計

關

五字

隻淮海捍禦屯隘守把江面巡遠皆於此

取辦焉

大使馬光祖創造船寨江津戰艦多且十年少僅三
數年已損動矣而浙右民船至三二十年不壞無他
亦藏之有其道耳前此護船止用蘆簾關請失時已

裏鹵莽雨淋日炙雪壓風摧寔於船無益也乃即龍灣水次度地三百餘丈創屋二百五十間立閘啟閉而門其上扁曰沿江大使司船寨神祠官舍列於兩旁又創鋪屋二十五間以處邏者寨成衆船以次藏泊自是修船之費庶幾少損矣

大使馬光祖移采石水軍酒息錢專一修船造船采石江面最為緊要水軍舊有酒庫一所專一趣息補治闕艦其後歸之州官於是無以充繕修之費舊歲

行下本州復以庫歸之軍今僅一年已造到船

關四

字

隻修到船

關四字

隻酒庫利入歲增每歲所

修所造之船與之俱增自此采石水軍之船將不可
勝用矣

大使馬光祖第四次江西造富陽船并脚船共四十
二隻咸淳二年六月內支撥十八界會一十四萬二
千二百九十三貫三百六十文發下江西造船官劉
選等打造到三百料富陽船二十一隻并脚船二十

一隻

大使馬光祖第五次江西造富陽船脚船水哨馬船
共三百隻咸淳三年四月內支撥十八界會五十二
萬貫差提舉金全等前往江西吉州打造二百料富
陽船一百隻并脚船一百隻并水哨馬船一百隻

景定建康志卷三十九